

春
草
堂
集

重刻春草堂集序

春草堂集者謝君佩禾之所著也佩禾
家江蘇之甘泉縣祖父皆業儒髫髻卽
嗜吟咏處境雖苦而誦聲不絕好讀左
史兩漢書故著有詩語雜組等編讀徐
陵庾子山及唐初四傑文著駢體一卷
讀三李詩有古今體詩十六卷今略爲
五卷又好宋元人詞曲復有詞一卷及

黃河遠十二金錢諸傳奇皆已梓行於
時其所未付梓者金玉瑣碎花木小志
古今錢錄書畫所見錄余嘗聞阮甥小
雲所稱如是道光丁亥佩禾攜甥書暨
所著來謁把晤時若舊相識居無何揚
郡饑佩禾挈眷來依於是良辰淑景上
下議論頗有愜余心者余益器重之然
性剛疾惡雅好直言浮華之士咸輕而

笑之佩禾若弗聞也或有譏之者曰以
子之才何困苦如是佩禾笑而不會朗
吟其述懷句云世無知己求諸已才不
如人且下人凡有詩之佳者必記其姓
名爵里而錄之錄既久彙而刻之名蘭
言集蓋取同心之言其臭如蘭之意性
復好遊澥內名山大川足跡殆遍其所
與交遊多公卿大夫冠蓋往來者三十

餘年絕無請託所居惟僦屋數間圖書
花草而已今年春余重刻鐵山園詩集
佩禾爲之讐校甚有力焉余亦因其舊
刻諸書遠在揚郡且多冗雜乃爲去其
繁蕪仿六朝舊刻本以駢文爲冠仍依
叢書體例統名之曰春草堂集佩禾頗
避余言卽丐余序余不獲辭乃書其大
略云爾道光二十年秋七月襲封衍聖

公孔慶鎔冶山甫撰

卷一

春草堂詩集序

昔有貽蘭言集者始知謝君佩禾之名
觀厥所載簪組爲盛有以見交遊廣也
竊惟君神儀峻朗服御麗都其籠罩揮
斥舍信陵平原莫偶迴非繩樞抱膝隘
與古徒者所堪投契以是質友則又未
遑其言蓋謂君曾蒿藿中聲震金石特
以志趣超邁欲周覽宇內川嶽靈琦恢

拓胸臆鬱勃且欲遍謁當代賢豪接其
德容偉論以證視聽類殊隕獲而一時
名公鉅卿重厥雅才互相贈會焉於是
又知君擅詩之名時迺憩景里開竿詠
伐木自分擁腫卷曲罔劬匠者斤斧故
未嘗就見顏色逮後薄遊淮浦凡君所
遇尊顯耆宿已弗克見惟與大江南北
二三儁彥恒作文酒之會是時與君邂

迨庶乎唱和增佳詎意緣慳差池蹤跡
近者飲輩嘯儔雲消星散而濡滯江湖
益憎疣贅遂來遊廣平迺爲舊交沈匏
廬太守殷勤息踵今茲君亦蒞止何圖
良覲爰得於斯出示春草堂全集見其
靡體不備靡藝不閒則思疇曩知名猶
淺也就於古今體詩五卷誦之第覺霓
采鯨鏗駭耀心魄固宜蜚譽詞壇縉紳

膺服者已然獨謬索嚙矢何哉復拙虞
瓠落久廢寤歌恐啞喑眇音難助瑞鳴
節足而君問途於希夷寥廓斯亦異矣
雖然古亦日月今亦耳目凡厥風雅之
流珍君篇什必有法其緣情綺麗者匪
僅若君薈萃同心之辭也支離遲暮尙
克踴躍祈觀爾道光二十一年辛丑秋
七月西陵張復敘

駢體文自序

吳山尊學士嘗謂余曰四六之文不難於用實而難於用虛斯言遽矣孔顓軒太史亦言庾文落花芝蓋楊柳春旗一聯若刪卻與共字便成俗響陳檢討之四圍皆王母靈禽一片悉姮娥寶樹此調殊惡若在古人寧以兩之字易靈寶二字又言縱橫開闔一與微體文同也余因二公所云謹守其法然亦未敢示人戊子春在朱虹舫閑學舟中論及於此索觀許可命付梓氏余不能自信又不獲辭遂復刪其繁冗存二十九篇云

春草堂集卷一目錄

賦

長征賦

悲賦

桃花賦

白蓮花賦

啼猿賦

怪鴟覆雛巢賦

書中乾蝴蝶賦

表

爲豫章公賀平回疆表

爲晉陽公陳情表

序

紀恩自序

代

蔣竹侶詩序

紅研集詩序

紅豆吟詞稿序

同阮梅叔遊桃花菴序

送陳穆堂遊杭州序

引

自書黃河遠傳奇小引

書

上曾侍郎書

俞富觀察書

與譚鐵簫太守書

與姚石甫大令書

與湯參帥書

啟

與友人偕書啟

謝石谷上人惠芭蕉啟

孫古愚六十一壽徵詩啟

碑

揚州平山司徒廟碑

疏

募修永濟道院疏

代

祭文

代江都令祭城隍神祝文

祭相七姑文

墓誌

湯母曹孺人墓誌

春草堂集卷之一

甘泉 謝堃 佩禾

賦

長征賦

歲次丁亥序屆三秋謝子整轡以遨以遊乃望雲而歎
曰天地生人云胡不齊如謝子者享榮期之三樂抱方
朔之恒機披鹿裘而寢嗣泣牛衣而有妻自京至粵載
馳載驅愧乏十時之策空牽謁貴之裾誦王粲登樓之
賦懷昌黎薦士之書蓬轉萍飄經寒歷暑五嶽登臨九

州弔古魂蕩幽并夢流荆楚理筇策於佗臺泛琴樽於
鄂渚浣花谿畔遷客居愁折柳隄邊春人設祖攢翠新
苔落紅舊雨鬢點繁霜心懷故土堅冰凝而馬背寒烈
日蒸而脣舌乾華陰怪石隴首飛湍魚腹層波不少京
京之鱸羊腸九折尤多跼跼之鳶朔方莫吹瘴癘朝煙
馬旣空乎冀北米偏貴於長安事之如是人何以甚至
若巫峽猿多衡陽雁斷白晝方長青春已換當來日之
大難恰雙輪之未轉又若牀前皓月江上蒼葭鄉原逆
旅人各天涯悵容與而久駐念日夕之將斜亂曰眼花

落兮手足僵心旌搖兮途路長奈少婦兮守空房盼垂
楊兮春凝妝拋殘紅豆兮湘蘭芳車遙遙兮天雨霜關
山修阻兮征夫斷腸

悲賦

并序

余妻父某鄉黨素稱其直好忤時輩旣罹非辜
窮戍極邊今四稔矣感古人悲莫悲兮生別離
之意故以悲名其賦辭曰

悲乎哉秋之爲聲兮穿萬木而鳴咽感愁人之惆悵兮
纍心胸之鬱結思夙簪之顏色兮挂屋梁之落月迷路

遠而莫致兮，阻關山之難越。託蒹葭以喻情兮，溼羅襟之淚血。審古人之直道兮，似劒鋒之必折。抱卞和之幽怨兮，緣獻玉而足刖。非鄒衍之下囹圄兮，天不爲之隕雪。故萬死以投荒兮，倏春秋已四閱。當茲白露蕭蕭兮，聽班馬之哀鳴。傷四千里之迢遙兮，非鴻雁其誰征。蒼梧號兮，夜森森。白帝來兮，江冥冥。展靈旗之墮月兮，割片雲以爲旌。驅猿猱以作隊兮，逐魑魍而宵奔。矧瘦骨之稜稜兮，忍二豎之憑陵。羌綈袍之無贈兮，需芝草以煎葠。憶管識余于髫髻兮，締嬌女以爲婚。更易余以嘉

名兮培厚德之載坤

余初名均

冀白首以永好兮侍朝饗與

夕殮詎中途之沮喪兮襟南北而判分願此夕之夢魂
兮晤河梁而執手剖相思于樽前兮幻繁華于烏有倚
冰凌而爲山兮能腐物之不朽雖趙盾之炎威兮猶變
禽于園柳曷若餐茲落英兮酌葡萄之嫩酒被芙蓉之
帷帳兮奉芝蘭以爲壽使余側身西望兮得清風于戶
牖聊慰余之悲愴兮紀太歲之在丑乃爲之亂曰悠悠
蒼天不我覆兮違斯懷斯俾我倅兮願言翼翼宛如鵠
兮旣見君子中心束兮明明赫赫然晝燭兮悲從中來

如轉軸兮

桃花賦

桃花歷亂舒紅芳繁枝穠蒂驕春陽去年今日相思斷
腸桃葉渡頭裙前水桃根座上歌遶梁楚臺春色周宮
曉妝舞衫窈窕歌扇迷藏羅幃朝褪粉碧簾暮空牀於
是趙女停箏秦娥罷瑟使妾關山勞夢魂慙爾枝頭好
顏色錦鱗兮一尺鶯愁兮如織蕩子不知愁年年愛遠
遊天台雙屐武陵一舟落花水面千葉牆頭元都觀裏
客辭家公幹園中日已斜願將舊時明月色還照東隣

五樹花

白蓮花賦

澹煙籠水清香襲衣花攢雪色葉展瑤輝其時南北東
西無非魚戲風雲月露莫辨鷗飛涉空空之妙境嘗戀
戀而忘歸十里莎隄幾家茅屋飄飄而柳線垂青泛泛
而湖波送淥何處輕舟斯時豔曲折青荷于浦裏婦應
居中論玉貌于宮中郎偏弟六爾乃敞瓊筵脫素轡書
傳河北妾憶江南非鄭公而碧筒誰勸非昌遠而玉環
誰探當其春草芊芊蓮葉田田現牟尼之寶座泛太乙

之仙船種向銀河偏宜露洗分來玉井不受脂妍及夫
粉墜蓮房關河已霜橫塘信杳團扇情傷曹植之朱華
羞擬徐熙之粉本潛藏蒹葭花疎幸伊人之宛在茨菇
葉爛幻夢境于微茫荇絲兮初縛菱支兮猶弱白頭吟
就家在臨邛白雪歌成人來京雒涇粉淚于羅帶寄哀
情于絃索歌曰采蓮算采菱菱角刺妾心妾心已磐石
留作搗衣砧再歌曰波光醺醺湖煙碧爲郎采得蓮中
的妾心自苦郎不知思君子兮傷算遲

啼猿賦

丙戌秋八月謝子由江陵蒞流將達白帝泊舟荒山之
下是夕也月明星稀清援夜啼獨客萬里涕下沾衣渺
鄉園之迢遞悟造化之精微乘興登山童子是依於是
埽蒼苔席淨石命筆研題峭壁吐千秋之糟粕快一時
之曾臆四韻麤成落句未得其奈援聲哀惋助人悲慘
林深篴密霜飛雲黯童子催歸舟師解纜枕流未憚東
方已白兩岸閭然乃重余以歎息

怪鴟覆雛巢賦

并序

怪鴟鴞屬也鴞者梟也食母之鳥曰梟余於庚

寅春僦居揚城院東李氏宅宅有小園園有雜
樹樹之避風雨處有雛巢焉將伏卵其時怪鴟
亦栖是樹日夕爭撲余以常見無怪秋八月鴟
忽夜毀雛巢其聲甚厲繞樹啼三晝夜向南飛
去雛由是亦無栖所後聞鴟爲大鳥所殺有感
於懷賦之云爾

天生爾鴟夜揚晝伏雛丁未造遭爾荼毒何形狀之不
颺乃啼聲而類哭喙鉤爪鋸翅鍛尾禿食母兇狠逐婦
反覆降灾若雅不祥似鵬傷哲士兮已往累貞婦兮胡

酷天雖設網怒不獨乎蒼鷹門固張羅仁莫慈於黃鵠
於是養驕成性侵占爲能每貪自適不畏人憎俗雲情
而恣掠仗風勢而飛騰爾又秉賦頑拙不憚同林占彼
雛巢非類乃羣仿飛燕而滅火習牝鷄之司晨當其雛
詹大歲擇木而栖風條陽直雨葉陰低雌方伏卵雄守
其儀飛明月兮清霜寒落空階兮木葉稀怪鷗當茲兮
奮餘威奪雛巢兮巢墮枝破巢完卵兮天道如知豈無
斥鷃羣隨鷗飛繞樹三匝無枝可依鷗逃雛散永夜風
悲於時寓園主人滅燭未寢短褐高冠終宵引領嗟彼

微禽侍橫吞并卽大鳥以行誅若有司而示懲賦茲鑒
茲余懷凜凜

書中乾蝴蝶賦

若夫書藏東閣蜨寄南柯恍金迷而紙醉堪粉摘而酥
搓栩栩蘊蘊悟此生之大覺禺禺雅雅拯百世之頽波
豈文人之好事實志士之愁多蜨雖微物能寄豔情於
金粉蜨乃靈質曾回萬里於巖阿於時春景融和羣花
舒笑數聲蚓箴吹開離恨之天一派鶯梭擲就相思之
草滕王畫裏疎柳傳神羅浮山中夕陽寫照旣而佳人

團扇撲損齊紈嬌女宮帟分飛魯縞蟲近水而歛飛禽
帶霜而爭噪我所願也尺蠖之繭有徵誰其信之百合
之泥是寶於是春波濺暝曉鏡生涼漫穿碧樹遙度銀
牆溫香收於欄角膩粉顫乎釵梁文采觸畫羣之怒悠
遊容蠶類之狂三食神仙爾旣同於脈望曉眠春夢余
將泊乎蒙莊

表

爲豫章公賀平回疆表

臣聞舊埽匈奴衛青任重薄伐獬狁召虎功高然未嘗

春草堂集卷之一

帷幄之籌而不遵於

廟算者也當逆回張格爾知

天網非一面之寬倚地勢有三危之險肆行猖獗倏爾
跳踉封狼負豢養之

恩牧馬動窺邊之覺烽警驟生於塞上訛言已入乎關
中其時我

皇上赫然斯怒迺

命大將軍等曰王者止戈用非得已但禽有辜勿殺無
辜於是耀威武於雲屯張德刑於露布

王師蕩蕩雞犬無驚

聖德巍巍櫓槍自落薛征西祇須三箭早定天山曹武
惠不費斗粟已平江左而況黃鵠詛峪本屬么膺青犢
賽神原多醜類蠐螬地濶馬從青澥飛來沙漠天寒花
在白蓮開後雖單于之授首實突厥之將亡全整六師
未逃一虜較之碑留淮蔡柱勒燕然張仁愿築三受降
城李貳師置五都護府不是過也欽惟

皇帝陛下神武仁聖立誅土谷遙

赦閼氏使萬國懷柔四夷賓服於是藏鏡歌於樂府開

功宴於靈臺九地九天足宣威於外域七擒七縱永無
犯乎中原臣職任封疆神馳

丹陛聞秣馬洗兵之際是牽羊銜璧之年獨愧昌黎少
此日豐碑之製豈無王粲數當時槃木之歌

爲晉陽公陳情表

臣某言臣聞盡臣之道莫大乎忠忠也者莫大乎晉賢
俛讀前史彰彰具載臣愚以爲晉舉而外復恐有遺德
於板築隱才於屠釣者故留心中外以盡微忱且臣竊
祿已久昨伏聞

恩詔拔臣尚書臣不勝戰慄以榮爲憂伏思臣自內外任以來未有涓埃恒多

雨露某年某月日擢臣殿前侍御使嶠頭命筆寵荷天章豹尾含香

優頒

御膳又於某年某月日齎爾荆蠻蔓延川楚白蓮設教青犢翻城我

皇上知臣頑劣麤解武備

命隨大帥分掌三軍是甘馬革之言竟應羊頭之諺累

官沙漠開府伊涼

賞已覺乎非常

恩復施於格外於是龍團章服珠壓鸞黃鳳尾冠纓翎
飄孔翠旣佩韃而插羽更傳箭以論兵帳下材官盡賦
從軍之樂樽前幕府皆言怯戰之非似此

恩榮世莫與比方思盡犬馬之餘年報

國家而有目詎料染瘋痺於兩腋覓金櫃而無方豐饒
據鞍竟輸馬援蕭衰攬鏡轉勝班超自審病軀難當重
任再思而後求退爲宜欽惟

皇帝陛下憫臣衰病

賜臣骸骨

德逾往古

恩高若天況今

國不乏人時稱多士臣所見光祿大夫臣某才略在臣
之上兵部左侍郎臣某齒髮少臣之年若使代處是邦
遞臨斯位以之責敦誰曰不然干冒

宸極無任隕涕祈

恩之至謹遣某官某拜表以聞

序

紀恩自序

代河弁仲某作

粵以歲屆單閏月屆應鐘恭逢

皇上

萬歲千秋之節普錫光榮遐荒異域之人均沾化育

勅頒天上

九重之溫語偏多澤被泉臺舉世之私衷盡釋誠可謂
此心寸草得報春暉者矣矧夫臣本布衣系由東魯奎
婁分野春秋稱秉禮之邦葵藿傾心草木抱向陽之志

家風好勇四庫無功世路維艱一錐難立披裘六月居然阮藉途中帶索終年不是楊朱道上所以相如入蜀權爲賣酒之傭王粲依人先賦從軍之樂感呂刀之有贈慚江筆之無花嗟嗟當陸機入雒下之年值馬周在新豐之日臺駘爲祟身忽丁陟屺之憂藥裏無徵天竟兆易嬾之象劬勞罔極大慟無聲熊膽和丸蠅未蟠乎綬笥魚羹覆樹淚先灑夫松楸當斯時也秋月橫空一天縞素新霜殺木萬葉蕭森狸首斑然琴音鎔矣從茲負米更誰嚮指於門閭此後聞雷空自結廬於龍墓於

戲痛哉此則乾隆之某年月日也差可慰者喬陰垂蔭
晚景逾鮮鸞髓煎膠慈暉再續如賓故事田間之餉饁
重攜舉案高風廡下之礎春自賃憫孤心之桐樹衣不
裝蘆感蠲念之萱花園多種竹於是擬良禽而擇木敦
騷客以卜居淮水河邊清流可枕桃花潭畔秀色可餐
笑魯國之諸生作樂家之贅聾今夕何夕抱衾與綢達
斯遑斯運土且甃天一地一悟老聃名道非常前三後
三解釋伽喜歡皆大孰意悲隨樂至樹靜風生太歲當
雞椿庭易簣當斯時也歌寒薤露千條之弱柳垂眉詩

廢蓼莪五夜之啼鴟瀝血於戲痛哉此又乾隆之某年
月日也尤可悲者薛鳳分飛田荆頓萎鵲鳩原上難叶
壙篋花萼樓頭任譏栗布影形相弔偏陶令之生兒孤
苦伶仃幸李波之有妹知途老馬思伯樂以重逢臨爨
焦桐冀中郎而不見向空投筆敢謂封侯近水然犀無
非照怪亡何而堯多水患漢使桀查禹別神奸秦皇鞭
石陽侯踏浪防秋歌瓠子之章黑帝司權測澥獻窺蠡
之策灰能止水不定囊沙燕可銜泥何須精衛因而思
蒙大府不遺一簣之功德感

天家鼎晉七階之職河渠一攷窮搜水部經綸防禦三
年愛種河陽花柳當斯時也方謂版輿奉母衣綵娛親
詎意二豎仍侵千方罔敷繁絃急管猶稱七秩之觴斗
酒隻雞復斷百年之養於戲痛哉此又嘉慶之某年小
日也終身抱恨慨澤國之滄桑四解安瀾荷
堯天之雨露

一人有慶

萬壽無疆唾落紅雲春生碧壤捧

黃封而

御香惹袖縣

紫誥而瑞靄彌空舉頭向日便是長安矯手臨風用伸
鄙意官無德政非羊公墮淚之碑事紀真誠亦李密陳
情之表

蔣竹侶詩序

評月譚風固騷人之本色裁香翦翠亦羈客之恒情然
而境有不同人各有志所以拋殘紅豆滿地相思打起
黃鶯一天魂夢論指爪於薜蘿山上采芙蓉於杜若洲
邊此皆古人處於飄泊者詞也後之繼起者則有折柳

聲中唱摩詰銷魂之曲浣花牋上寫蕭娘腸斷之書若
夫水滴銅龍希聞晝漏絲牽玉虎驟睹晨妝擊珊瑚於
鬪酒之場贈玳瑁於彈箏之席此又古人行乎富貴者
詞也後之繼起者則有僧孺丞相釵飾排金汾陽令公
屏風設寔總之嫩人香草無傷屈子之孤忠翠簾鴛幃
反覩仲先之雅尚者矣今之竹侶先生生號江東羅隱
之布衣名重橋鄰丁卯許渾之鐵篴樓空於是走馬蘭
臺攜琴解嶠柳條籐蔓歌春風湖上之亭楓葉荻花泛
夜月江干之櫂刀頭舊夢月挂秦關篴裏新聲雨淋蜀

道嗟乎雕蟲技小偏逢元相當時繡虎詞工不是陳思
在管因而刺焚車右劒挂墳前嘯擬孫登傍青霄而跌
坐睂攢陶令來白社以論文擊鉢爭先藏闔閭險闢西
崑之豔體暢南國之芳聲花散諸天衣裁無縫集千狐
之腋紙上生春抽一繭之絲行間墮粉以至嬉笑怒罵
無不文章羣怨興觀總稱絕調僕懷縞紵敢序班荆金
粉爲題庾信之生涯可想玉臺重展徐陵之駢儷奚辭

紅研集詩序

夫風雅之意不同而金石之音各別故深於情者言多

比興雄於氣者聲自渾成嫵媚者喜尚詞華跌宕者善
爲排異同車異轍彰彰明矣然則玉臺金粉重開六代
之新聲香草嫩人繼入九歌之妙境者誰與則有北澥
名流隴西望族住綠楊之郭愛碧玉之歌集著紅研辭
稱黃絹芙蓉映日春迴太液之波楓葉受霜冷遍吳江
之水餘霞散綺芍藥翻階丹液流而句漏春火雲燒而
益州赤遂使藻續紛紛皆霏絳雪相思寸寸悉裏紅雲
矣宜乎鴛瓦蜃窗買絲繡平原之像交疏互牖鎔金鑄
賈島之容紙醉金迷桃嬌柳嬋陌上之花驄驤裏公子

魂銷樓頭之楊柳菁蔥阿儂腸斷故歌褰舞扇託楚些
以摠懷酒地花天藉齊諧而博笑亡何彩雲易散狂士
多愁當繁華豔麗之場作南北東西之客煙花三月轉
教騎鶴它鄉燈火十年竟未隨鵲

帝闕爾乃挾瑟齊都揚鑣吳會關山作賦敷王粲以登
樓湖海思家類陳登而返樵嗟嗟三百六日之隙駒一
瞬二十五絃之古調空彈縱使詩洽池塘惠連有夢其
如鬢添霜雪伯道無兒尺素千言文猶蘇惠丹青一幅
病已崔嵬所以莊生創鼓盆之歌牧犢製朝飛之曲者

良有以也僕名非徐孺嘗下榻於陳蕃才謝襄陽竟折
衷於李白桐廬江上舟共林宗飯潁山頭詩懷杜甫及
夫集閨闈之腋舒豔麗之花歆剛將開茲蕙是獻願此
日香焚一瓣異域人來勝當年賦就三都中州紙貴

紅豆吟詞稿序

紅豆吟者管湘樊秀才詞也秀才系出南朝擬崔盧之
甲第文興八代擅徐庾之辭華沈約多愁腰肢固瘦相
如善病神氣偏揚若植向興慶池邊卿真楊柳便移來
潯陽江上妾亦芙蓉而沉乎丙舍臨湖喧無車馬丁年

入泮富有詩書聽銀鑰之重關夢秦箏於隔苑盼金蟾
之嚼瑣誌楚舞於回波減字偷聲洗開面目曉風殘月
賺出窠巢將謂掌上纖腰檀槽變徵關西大漢鐵版移
宮而說者猶以輕薄爲文雕蟲見哂遂使人皆欲殺有
誰存忠厚之心我見猶憐欲代辯風騷之體考諸三王
傳裏間有卮言元命苞中亦多譎語漢唐樂府曾收花
月新聞今古詞林每載風情故事鉛昏粉黦白頭之宮
女還來地棘天榛管日之何數尚在至若劉采春囉嘓
三章行行墮粉溫飛卿婀娜一曲字字搓酥北苑羅帶

翩翩火鳳後庭玉樹鎔雜金蛾此皆出自錦心傳之香
口何得以腫背之馬而笑垂天之雲哉

同阮梅叔游桃花莽詩序

野鳥鳴春東風送暝晝長思睡良友忽來樂興而駕扁
舟非同泛雪踏青而攜雙榼豈止聽鶡隨意狂譚盈眸
好景兩三百株楊柳軟白飛絲七八十樹桃花亂紅飄
雨於是泊舟桃花莽畔是莽也面枕清谿背環高阜藥
扶疎而蔭屋藥高下而翻階竹筍抽廊荷錢貼水已而
舟車螳集士女雲來或凭欄檻而垂鉤或起軒窗而讀

書或登高而眺遠或索筆而題牆笑聲穠而脂粉香巾
扇揮而蜨蠶亂說今譚往時已將昏喚隊呼羣少焉月
出響箏琶於隔岸張鐙火于通湖串串歌喉如珠走玉
枝枝畫檣似燕衝波聞咎日之水嬉亦古人而行樂況
襖被于山陰亭畔曲水流觴讌開於桃李園中春宵秉
燭然而酒闌鐙炮雲散風流未免有感于衷各裁四韻
並書其所見云爾

送陳穆堂遊杭州序

綠波南浦淹也銷魂皓首河梁陵乎執手所以管人有

行復行矣之詞悲算悲兮之感離亭風簃既有慨於當時煙水布帆能無悵乎此際吾友穆堂陳君繼千秋下榻之風吐百尺高樓之氣幼不好弄對解楊梅長復多才賦傳鸚鵡矧天門多停轍家有藏書冠蓋頻來應接無暇因而思跨揚州之鶴將爲淞水之游告余以期至日余遂置酒於官河之側長跼而言曰淞水雖君舊遊之地余亦略陳其說余頻年南臨閩浙西極蒼梧北走雁門東渡遼水竟不可不謂見不多識不廣矣然區區抱樗櫟之材匪璠璣之器猶能使公卿下問大夫枉顧

況君有驚世之筆兼天人之學註書盈尺賦詩成卷路
不出乎千里境不越乎三江負此盛名豈少逢迎者耶
吾子行矣何所悲哉所悲者吾與子道旣同矣契復合
矣似芝蘭而不可分似雲龍而不可離也櫻筍富筵必
欲踐薄鱸之約琴罇作贈待流連山水之需僕在西湖
是去年今日誰爲東道乃戎馬書生其人湯姓雨生字
也現官杭郡叅戎下士親賢有都督閻公之望清詞高
詠有將軍謝朓之風身雖繫於一官目已空乎餘子詩
追開府書仿右軍顧悞周郎丹青曹霸其才也如此其

賢也如彼君倘能特謁於崇階並道其下走料必虛左
席以張筵賞紫電青霜之富駕高軒而過訪証通眉長
爪之奇追平原十日之歡補雒下五君之詠子行矣然
又何所悲哉所悲者光陰有限年壽幾何感舊雨之續
紛似晨星而寥落垂楊怨別芍藥傷離何日晴來再對
山花而共酌斯時別去更誰仙侶以同舟凡遇知音道
余契慕言有未盡繼之以歌歌曰芳草青兮閨恨生流
水濺濺兮柔櫓鳴子將別我兮向南征船伐鼓兮歌揚
舲仙之人兮吹玉笙被薜翠兮紉蘭芬亂心曲兮傾芳

樽余懷渺渺兮誰與論願爲雲兮依太清

引

自題黃河遠傳奇小引

孔爵南飛伯勞西顧春風影裏忽拈來十丈情絲電火
光中早證取三生慧業當其西華初歲被褐騎羊翁子
頻年負薪友鹿遂使脩無恙贅人憎何物書生系出牛
醫誰識諸侯上客隴頭流水聲嗚咽以空悲天末行雲
色淒涼而誰問乃有青樓俠伎北里名倡翻玉珮兮歌
春陽汚羅帶兮逞嬌豔停車小坐滿林紅葉爭飛對酒

發聲一曲黃河遠上當年待字鳩鳥爲媒此夕傳書虺
蛇入夢嗚乎淮陰晉食哀王孫於未遇之初瀨水投金
報佳人於旣亡之後慚無上德何以忘情況值中年那
能無涕嗟嗟傷旗亭之舊事寫樂府之新聲偕它優孟
衣冠點染吾家絲竹云爾

書

上曾侍郎書

蓋間居上德者秉聰明而聽視非常擅千秋者憑造化
而陰陽自轉斜三橫四天啟文星贈白酬黃世稱長者

汝南之有月旦重在鄉評邳水北於龍門爲增聲價當
君侯都轉揚州之日設題襟之館開講學之堂豔夕照
於桑榆振奇材於管蒯於是孤寒八百非李相其誰依
賓客三千舍孟嘗而焉往當時譚士皆謂文章乃君侯
餘事牢盆籌算何讓桓寬禹筴持衡幾同劉宴二分朙
月眩綺縠於郊原十里珠簾沸笙歌於巷陌連車結駟
盪槳揚颿濺湖上之春嬉被城南之秋爽風流自賞豪
邁無羣然則泰而不驕滿而不溢者皆由申之以約教
之以禮故能財阜甲於江左嫩質盡乎東南使天下壤

奇之士無不願從君侯遊者矣。堃其時守禮邱園未得
瞻榮棨戟服闋後聞君侯調臬陞藩光臨楚粵未嘗不
戚戚於心若有所失也。卽君侯復任兩淮鹽漕政事攜
樽父老歡言黃霸重臨騎竹兒童亦識細侯再任將謂
藥符金帶屏開翠軒傳西府之賤命東園之酒梅花閣
下書記翩翩楊柳隄邊旌旗閃閃若韋絢之居官誰非
曳履適王陽而在位我尚彈冠謁禮未修鴻裁先至蒙
賜賞雨茅屋詩十八卷題贈青山別墅圖一幀盥薇奉
讀齒頰皆香什襲珍藏珠璣並韞光輝驟生於蓬華名

姓忽繫乎縹緲德感高軒有憐士憐才之誼情生下走
興量波數髮之懷望旣慰乎思魚志能免夫焚券況諺
有之曰士爲知己者死女爲悅己者容忍有所聞而不
申訴者耶巷議街譚道聽塗說言君侯裁汰舊章更變
新法頗有未便於民者然則有君侯之志尚可恐後來
尤而效之豈不使終古繁華頓成蕭瑟矣略陳固陋附
繕一冊願君侯覽之幸甚幸甚再拜謹白

龔富觀察書

五七兩月連奉札示敬審旌麾於本年四月行抵陝州

琴瑟鼓鐘此地擅周南之嫩雲山春樹咎人興渭北之
懷三月蠶桑蠶黃政績二陵風雨燕許文章堃濟城判
舊淮水奉書虛絳帳已三年著清幘於萬里泛舟閭泝
採蠻花犵鳥之奇飲馬灘江涉瘴雨癘煙之險棚民蛋
戶語雜侏儻沙妹珠娘情多佻達採越吳之風俗菰米
莼羹記荆楚之歲時荷衣蕙帶趙佗臺上草細如茵武
肅江邊濤飛似箭若乃綠珠井畔了角山前悟三生跳
月之緣偕一杵元霜作証白香山之樊素愛伴琴書張
志和之樵青願偕簑笠烹茶埽雪低唱吹簫玉旆奇夫

兼葭夢復徵於弧矢韋安道之庶子已驗張鎧東方朔
之小妻任譏懷安然身經五嶽祇算飄零囊賸一錢轉
貽羞澀況雞鳴竈下獅吼河東權成無用之花護豈忘
憂之草且未能磨磚作鏡又安得咳唾成珠於是短褐
行吟長鑣託命側身北望盼斷慈祥裹足西來屢經噩
識嗟嗟傷二豎之憑陵更三尸而謔浪茶鐙影裏未盡
孤鐙藥杵聲中僅餘殘睡當其遠調衡泌高荷雲天未
嘗不奉書而涕泗橫流慙感交集倘能虞翻不死劉向
更生定駕柴車來依畫省伏冀高厚原察不宣

與譚鐵簫太守書

資江一別裘筵三更坐月論文常懷顏色臨風翹首不
盡相思隔歲於藕花香裏菱葉波中與桐生公子藥舟
脫帽淪暑分瓜偕東道之餘閒語西川之往事夫使君
走馬健爲啖墮林之粉停車魚腹祀澤水之祠鹽井靈
龜弔頭白虎筇竹茹醬歆格禁其鬼神攘蛋蟾夷死生
判乎巫蠱及夫白蓮花謝錦鴨波平磨盾勛高橫戈氣
短雖君平之技藝名可千秋然司馬之文章家徒四壁
遂至長安西望頻翻李白之詩五馬南來熟讀王遵之

傳其時埜也似避讐之張儉若放權之陳登弔張芝於
長沙哀屈原於湘水與公傾蓋一言而道契神符許我
摳衣三月而花天酒地牀帷上下簫管參差鐵板興衰
高唱大江東去金經懺悔同叅三乘西來事邇人遐星
移物換賸依依之舊夢還坐春風磬落落之孤懷聊憑
過雁但祈珍攝不盡所云

與姚石甫大令書

雲迷雁汊情深停笨伯之車月隱龍谿興酣斫王郎之
劍人之遇合非數而何當僕初晤足下之於桐城也前

村雪裏昨夜花間君在盧前我居王後偶因數語大快
平生開瑤筵以坐花對茅屋而賞雨更深拔燭臘盡傳
牋申車笠之盟踐苔岑之約高山仰止流水東西旣而
僕走京師君遊閩海感晨星而寥落傷遠道之漂零君
雖匏繫一官我亦罄縣八口況日月易逝且形貌就衰
銅山之鐘因風應響延津之劍感炁潛飛僕再晤足下
之於漳州也冠塵寸積輪鐵尋消千里命駕而來一夕
衝波而去錦城雖云樂芳樹已如斯旣羞食武昌之魚
又懶醉蘭陵之酒而沉乎錢塘舊夢望遠人歸顧渚新

聲念家山破此僕之所以行也別後之台灣台灣之民
咸謂足下非百里常才乃萬家生佛滿城桃李已分潘
令之春異域山河更洽文翁之化於是乎僕聞斯言爲
足下喜復爲足下憂古人建功立德淑世修名足下有
之矣然恐一人向隅滿座不樂奈何奈何足下乃命世
之才它日必能教我區區抱知己之感臨風豈不懷君

與湯參帥書

三換柳青再舒葭白當斯冷月虛此孤懷徹喚奈何而
已前歲旌麾南渡符節東歸適鄙人有所清淮未申契

濶悵何如也友人昨從杭州來道其建牙吹角周亞夫
細柳營開聽鼓離城羊叔子輕裘帶緩壺投鈴閤飛激
箭於三春詩唱弓衣繡綵絲而五色僕聞斯語有感於
衷夫褒鄂武功未嫻詞賦英彭將略豈擅文章號萬人
敵而結髮從戎陳三篋書而請纓出塞橫矛丈八踢壁
十尋探虎穴於山陬拔鯨牙於海濫飛能食肉叱咤風
生坐待封侯騰驤雲起然皆祇諳韜鈴難諧競病何戲
下槍施半截筆掃千人枕戈而三略無遺倚馬而萬言
可待曹將軍之畫馬粉墨生威周都督之顧曲弓刀應

響至於郭令籌邊梁公賜字勒勲名於銅柱洗兵甲於
銀河曷若偕一邱一壑之間情演九地九天之兵法樓
船錦旆陣勢雍容駿馬銀鞍軍容整肅而況門非杜甫
嚴公之禮數偏寬臺異子陵侯霸之事聲未歇解衣磅礴
容我登牀脫帽麤疎與君對奕當茲酒酣耳熱路遠
神馳煙水無涯悵雲天而每思大樹東風有便憑驛使
而早寄梅華

啟

與友人俗書啟

空山一叟老屋數椽謬分一斗之才實乏五車之富竊
思茂先道上篋秘庚辰李泌厨中籤排甲乙未窺要覽
愧非皇甫居官暫假奇英宛似和蒙拜佛願回銀燭分
我餘光擬賦木桃報君永好

謝石谷和上惠芭蕉啟

雲移紺宇傳來懷素之書雪漬綠天分得王維之畫特
承雅贖深慰煩衷展此日之秋心悟當年之幻夢雖云
蕉衫一領可佩騷人然而米汁三蕉難忘佛印謹啟

孫古愚六十一壽徵詩啟

稼軒小印姓剖辛文

辛稼軒有小印破其姓文爲六十一上人

絳縣老人年

藏亥字鶯籠演劇幻實境而爲虛馬腹避災試小才而喻大此皆傳諸子史載在叢書之諷寓滑稽詞也今古愚先生當六十一壽之期作重慶十齡之說晨昏功課還同江夏黃童顛倒衣裳絕似楚中萊子真可謂鎔鑄滑稽託言諷寓者也況先生系綿康叔蹟著孟城山陟天台興公擅賦亭遊斗塾莘老能詩珠湧宵波運三十六湖於指掌文行天馬羅二十八宿於心胸是知昔年王勃墨透春衫此日邱遲錦藏懷袖儒林列傳人故推

博物張華隱逸新圖我獨愛常貧夏統衣冠簡朴古道
存焉奧旨精微才名重矣茲值花甲初週一元復始襟
懷磊落歐陽本六一先生頭角崢嶸皇甫係十齡童子
莖叻承雅命敢進弁言伏願碧落才人青雲貴客齊搖
綵筆競祝嘏於名流各惠瑤章俟采風於野史

碑

揚州平山司徒廟碑

白衣雖起於草莽青骨早驗乎神明勿因成敗而論英
雄且辨忠貞而崇奉祀當其異姓報母殺虓虎於渡河

嘗穀救民殲豺狼於當道聰明正直旣格於天義智仁
勇又符於聖未有不血食一坊而香火千年者哉夫揚
郡乃九省之衝衢爲三江之門戶春秋代謝人事繁華
盛極必衰分久乃合此又終古循環理也若乃衣冠蟻
伏盜賊蠭生當金戈鐵馬之場有石闕銅駝之歎惟五
司徒神聖涉宋國之艱危據蜀岡之要害其時李全賊
鋒甚盛梟銳非常趁金甌而已缺況長城而自壞肆行
跋扈恣意猖狂鎖已沈夫長江戈尚橫於四野五司徒
不忍見掘鼠而食柝骸而炊於是曳三丈之繩起千觔

之聞張卷索戰殺犢誓師趙子龍陣上橫矛通身是膽
蓄邱訴河邊洗馬立斬雙蛟雖未能寰宇廓清然亦可
邦家稍靖而說者猶謂五官既稱應然五丁便可開山
丸泥尚能封函關衆木豈難支大廈獨不思朱仙鎮上
猶未免十二金牌郭璞江邊僅賸得三千鐵弩而況五
司徒倉卒起事偕刀劍於春農慷慨臨危託功名於橫
草飈馳電閃鶴唳猿啼猶能城保睢陽兵消皖口夫有
功於社稷合永祀乎犧牲詞曰

五都正烝萃於一方廟貌嵯峨壯彼蜀岡碧溪冬靜蒼

松夏涼兵後兇年皇哉儻言紅穀勿朽活民萬千醫旣
有方兵非獲已解上鮫鼉市中虎兇殺虎斬鮫跡類周
處奄有千秋靈旗俎豆蒼生是依赤子惟祐桂葉胙蠻
椒漿浮螳再拜陳言雲天無際

疏

代募修永濟道院改僧院疏

蓋聞法苑真詮揚子草太元於秘閣儒林妙旨毛公註
大雅於深山滴露研朱樹罷綠天蕉葉臨風灑墨攀來
碧澥楊枝置杯水於均堂芥舟可渡匝筐絲於席地玉

尺難量遂使猿臂聲中弄羽音而變思王之曲獅形座
下掘金身而兆荀勗之銘爰有邵埭之永濟道院初名
斗壇系羽客潛修之所花臥青牛設文人講習之堂觀
遵白虎所以前殿奉呂祖而後殿奉文昌者匪無因也
文昌開運判機杼於紅黃呂祖垂庥具鑪錘於典籍丹
火藜火萬丈之光燄爭長筆花天花五色之纖穠並豔
種松階下日繞龍鱗煮茗壺頭煙籠鶴夢豈期琉璃光
黯循環之輪劫難逃清淨魔高渺小之鍼鋒未隱斯池
竟涸三陸就荒彼岸未登一瓢屢空以至踏罡臺圯種

桃之道士雲遊暎雪牕虛劃弼之書生露坐燕巢壘壘
泥落空梁蛛網層層絲牽敗戶圖經增記遭蠹魚食遍
神仙鞠榭蘭池被春風釀爲荆棘衲竊思三教同宗何
分崖岸六時恒吉靡不因緣所以拭淚披榛敢云卓錫
挂衣壁荔暫效巢林問世界於一花一葉之間偕幡幢
於三藐三皈之後草能再插求無量法於慈雲鑑許長
然放大光明於慧路然而不有廢興何成否泰敢申短
疏普告十方大宰長官鎮山門而早留玉帶善男信士
來福地而共挽金輪謹疏

祭文

代江都令祭城隍神祝文

維某年月日吉知江都縣事某謹以旨酒庶羞之奠敬
祭於城隍之神賞善罰奸陽偵陰捕同掌司牧分隔顯
微當茲野馬橫飛商羊歇舞農夫有刈去之歌蠶婦有
補裳之歎而況秧馬半歸蝨賊茶槍漸屬妖氛巫魃不
除黔黎焉靖某雖德薄官卑神應懲兇示吉潤三時之
膏雨慰四境之民心願鑒蘋藻之虔莫負痼瘵之瘼尚
饗

祭杞七姑文

於戲銀河石爛空餘織錦之思碧落花飛無復唾絨之
跡飛瓊控鶴湘江之竹淚恒斑弄玉棄龍蜀國之鵲啼
盡赤小姑居處原在清谿神女生涯無非春夢此曇花
所以無久駐之權彩雲所以有一時之變也七姑相氏
系出金閭其氣如蘭其人如玉畫樓畫永香飄柏子之
煙繡幄春深衣襯石華之袖埽眉才子爭傳杜牧春風
南郡新書誰似關雎女娣茂漪法帖格擅簪花道韞清
才詩推詠絮鐙飄珠箔盈盈纖手以當牕井墮銀瓶襲

襲膩香而浮水乃若年纔毀齒性解恣蚊體未勝衣悲
傷陟岵蒸梨剝棗分高堂并白之勞暎雪囊螢勉諸弟
詩書之礪冰懷朗朗金屋何難卓識汪汪慈幃是戀它
如遠山攢翠新水含波捲蕉葉之秋心泣桐陰之夜雨
碧紗描粉幅幅觀音綠綺操絲聲聲子夜名呼鸚鵡隔
簾之響版頻敲信重烏衣去日之紅絲尚在憎夫明珠
韞匱無善價以難沽彩鳳搏風匪高梧而莫集空房膽
小永夜心孤兩行之燭淚頻流一縷之藕絲欲斷僕內
子以瓜葛之因得通芳訊閨帷之誼時領徽音曾分玳

珣之釵共架珊瑚之筆流鸞乍轉攜柑結鬪草之盟春
水方生打槳赴渝裙之會兩期翠袖蠶陌攜筐詎意紅
牆蠅宮坐命鏡埋圖畫黃楊當閭厄之年澥幻樓臺青
鳥有修文之請欲歸天上病祇三旬暫謫人間年纔十
七桃花門掩嗟薤露以何晞黃竹箱空盼佳人而難再
於戲痛哉薄命有徵嫩人無壽信斯言也然而杜蘭香
去鮫人泣入澥之珠萼綠華來龍女詣昇天之島天原
有恨月豈常圓尚饗

墓誌

湯母曹孺人墓誌

孺人姓曹氏甘泉人似碧玉而生自小家能麗玉而洞
明大義於康熙三十八年年十七相湯九錫贈君三日
入園七日告廟薦蘋蘩獻榛栗承筐簋而采芣苢奉箕
帚而拂琴瑟絲牕器具祇設流黃清鏡容顏却嫌脂粉
擬鮑宣之故事并獲親提慕冀缺之高風壺餐自饋第
處並光於蘆簾紙閣能供絡秀之夕旨朝甘況頻年旱
魃爲苗馮夷肆虐青秧赤豆臨風開無用之花苦竹黃
蘆繞宅生多愁之筍斯時也天欲宣柏舟之化使先厯

茶境之艱於康熙四十六年秋鵬鳥初臨玉棺遽下豐
城之劍雄竟先飛德水之鐘聲憑誰應初贈君病孺人
飲泣煎膏焚香禱佛蓋棺後孺人以矯矯之禽曾同比
翼冉冉之竹不愿孤生或謂孺人曰死節固佳奈堂上
之孀姑何姑前之弱息何其時贈君弟諱九經者纔八
齡猶嬉嬉弄孺人衣裾孺人所以感采采卷耳之煩憂
墮燕燕于飛之涕泗著瓊樹朝朝之想存青天夜夜之
心愴惻無言飲食勉晉五更風雨飄殘杜宇之魂一夕
冰霜老却梧桐之色孀姑繼逝七星映北斗而無光古

井凝波一鐙向中宵而迨滅替人作嫁幸贖錢刀入土
爲安何妨蒿葬旣殯遂使九經入塾病瘳幢幢春藏鵠
色寒機軋軋曉亂書聲是時也吳牛抱喘月之譏代馬
挾凌颼之氣伶丁韓愈惟嫂是依落拓王珪惟嫂是養
然九經頗似伏波正冠方入而孺人亦非邱嫂轅釜無
聲讀子昂之詩章章感遇展蘭成之賦字字傷心康熙
五十七年孺人以九經稍長聘朱氏子爲九經婚焉定
情之夕詩記繁欽對鏡之晨畫非張敞居無何孺人以
瑣瑣一切盡付新婦於是長紉繡佛稽首慈雲每值舅

姑暨贈君忌日被麻衣而泣墳墓縣紙幡而奠椒漿越
明年九經又歿新婦未婉蠶絲在繭恐傷少婦之孤懷
蘭夢有徵冀續宗祧之一脈新婦舉一子孺人錫遺孤
嘉名曰世泰蓋誨其時艱故也披秋霜而保太和倚春
風而遵上德單鳬寡鵠遞唱新聲藿炙藜羹飽食終日
寒旋暑轉常憑十指鍼工日居月諸悉傍它人門戶可
慰者世泰生而穎悟解楊梅之對有麒麟之譽動云顏
含報嫂雖屢日而青羽不修毛義事親必撥雲而彤徽
雙貯故於乾隆三年陳孺人之節請

天子之旌將謂洽洽雍和熙熙光化法歐邢之闢範傳
桓孟之芳型詎意乾隆十八年婺星光黯貞木枝枯待
秦醫而病已膏肓去越巫而魂歸縹緲卒時春秋七十
有一卽以其年月日合葬於某於戲素縑十丈書不完
柏操蘭芬白鶴千年願雙集佳城華表